

大同著

老子哲學

右任



蔣 序

昔人有言：「老子思想，偏於消極，爲中國貧弱之源」，此皮相之論。老子無爲而無不爲，於養生處世治國，一以貫之，何嘗消極。今有人言：「老子思想過激，近於無政府主義」，此亦一偏之見。老子鑑於周末文勝之弊，欲將仁義禮樂制度，一舉推翻之，自有其時代背景，明明有國小寡民之理想國，何嘗無政府。歷代之註釋道德經者，多爲文學家，雖盡力考索，恆不得老子中心思想。近代始有以哲學方法治道德經者，於老子之精義，多所發明。大同法師此著，其尤卓卓者也。余謂我國人之通病，是頭腦籠統，不善分析。自明代以來，盛倡三教同源之說，聞者翕然從之。余最爲反對，以爲各種教義或學術，爲有其出發點與到達點。就其相通之點，疏通而證明之，未嘗不可。必謂彼此完全相同，則大不可。如佛教與道教，一則主張，反妄歸真，超出三界，一則主張，長生不老，解脫升天，決不能同源。

舍道教而論老子哲學，其與佛教學相通之處，固亦有之。然決不能謂爲完全與佛家哲理相同。如老子之無爲，似乎佛家之眞如，然老子謂「天下萬物生於有，有生於無」，尙未達非有非無之境，似隔一間。又無爲自然，意中存一自然境界，尙略近於唯物，不若佛家之萬法唯識，爲徹底之唯心主義也。諸如此義，不勝枚舉。明乎此義，以研求大同此著，必更能明瞭矣。

紀元三十六年八月 蔣維喬

薛序

曩余隱焦山，結禪緣，忝執教鞭，學友大同，擅智慧，工文章，儕輩之所共稱也。平居精研經典，多所心得；間讀儒書，能與佛理融會貫通，發爲論列，輒洋洋數萬言，余嘉其志在排除儒佛二家之隔閡，而立利人濟世之說，默契非一日矣。

今秋，大同以所著老子哲學若干章將付剞劂，請序於余；余見之，喜可知也！惟大同既廣明孔孟道術；又深探老子思想，詳加析述，平易近情，至與釋門學說對照比較之處，尤足啓人！余按老子爲中國最高理性之書，曾經法國瞿亞姆波的愛譯傳歐西，其價值非尋常哲學所可及，大同以淺顯文字，筆錄研究心得，刊行問世，正不知可爲讀老子書者解決多少疑難？此余所以爲大同之研究成功，爲讀老子書者之研究便利而喜也！是爲序。

民國三十有六年九月十五日陽湖薛清平謹序

黃 序

漢書藝文志著錄道家專書，有伊尹五十一篇，太公二百三十七篇，辛甲二十九篇，鬻子二十二篇，筮子八十八篇，此五家者，皆在孔子前。而與孔子並時者爲老子。志載老子書有鄰氏傳氏徐氏三家之本，今所傳者，不知何本也。志又著錄劉向說老子四篇，向在成哀時，奉詔校古書，向輒取各本而校定之，今所傳者，或其校定之本。自向以來二千年間，說老子書者衆矣。漢書藝文志謂道家出於史官，歷記成敗存亡禍福古今之道，然後知秉要執本，清虛以自守，卑弱以自持，爲君人南面之術，此近年謂老子並不消極之說所由生也。志又謂及放者爲之，則欲絕去禮學，兼棄仁義，曰：獨任清虛，可以爲治，此近年謂老子思想偏於消極，又謂其近於無政府主義之所由起也。至隋書經籍志，則謂道家之學，體道成性，清虛自守，爲而不恃，長而不宰，故能不勞聰明而人自化，不假修營而功自成，其玄德深遠，言象

不測，此又近年謂其並不消極之見所由生。志又言下士爲之，不推其本，苟以異俗爲高，狂狷爲尙，此又近年謂其偏於消極等說所由起。劉向後七十年，佛法來中土，翻其書爲華文，而孔子經外有佛經，而道經亦隨之起，乃老子一書稱道德經矣。經籍志始立道經佛經兩部，此卽道教佛教之名所由來也。志謂道經所說，天地淪壞，劫數終盡，略與佛經同，又謂俗士爲佛，不通其指，多難以迂怪假託，變幻亂於世，所以弊中庸之教，是所罕言，然亦不可誣。漢隋兩志，辯章學術之明鑑也。其論老子與道經，道經與佛經之間，大略如此。今大同法師著老子哲學研究一書，後老子二千五百年，後劉向二千年，而後佛法來華約一千九百年，至以哲學論，則近四五十年西洋傳來之說法。蓋戰國說老子與漢初已不盡同，漢初與漢末，漢末與兩晉與唐初，唐與宋元，以至於今，因時而遷，不盡相同。今之繼以西洋哲學，又非以往二千數百年間學人之所能知也，然其心理，豈有異哉？吾讀此書而有所感焉，而知大同法師之說之與此不相背也。要之，佛也道也孔也，皆教人修德爲善，體道

反戰，勝殘去殺，同此心也，因果不磨，報應不爽，大同法師所見亦同，吾於此書表同情焉。

中華民國三十六年十月 上海黃慶瀾

白序

世人多以老子爲消極無爲，厭世逃世，殊不知老子之無爲，乃大有爲也。老子曰：「無爲而無不爲，我無爲而民自化，我好靜而民自正！我無事而民自富，我無欲而民自樸」。其所謂無爲者，豈非大有爲耶？況老子之所謂無爲，非教人一切不作，束手待斃也，乃教爲政者，不虐百姓，爲百姓者不妄生事也。老子曰：「常善救人，故無棄人，常善救物，故無棄物」。又曰：「聖人無常心，以百姓之心爲心，善者吾善之，不善者吾亦善之，信者吾信之，不信者吾亦信之」。此老子之非厭世逃世乃積極救世之精神也。故老子見妬寵負恃者，救之不尚賢，爭金奪玉者，救之不貴貨，驕傲者，救之謙虛，剛強者救之柔弱，此老子之救世精神也。大同法師深明此義，故以新見解，新思想而發揮老子之哲學，使佛家道家融會貫通，新學舊學合而爲一，此爲該書之特長也。

一九四七，十，二九，白聖序

本序

大同法師寢饋於老子哲學之研究有年矣，今出其大著問世，余得先讀欣慰無已！

竊思老子玄言流布中夏，其影響於學術政教者實多，爲之疏通闡發者何慮百數十家，求其能以悲心發爲淑世牖民之說者則不多觀也。茲著以說教之方式而立言，雖間有可議之處，然究不失其爲修養上之一良著，讀者當思其言權方便之苦心也！書中論列佛學與老氏之學相通之處，以予觀之實甚扞隔邈苦山河也。爰夫學術上古今中外容有類似之處，若以類似之點執爲相同而共通之，則兩者俱失之矣。矧佛學爲現智與量智之境，而能以它說塗污之乎？

余讀此著大略有如上之意見，好者壞者俱懸直而言，作者讀者乞諒之！是爲序。

民國三十六年十月卅日本光序於上海

自序

自古學者，不持門戶之見者鮮矣。孟子斥楊墨，以爲無父無君，韓愈之排佛，以爲夷狄之法，孔子聖人，猶曰：「攻乎異端，斯害也已。」可見入主出奴之風，由來久矣。此皆學者故步自封之陋見也！夫釋道儒墨，各有所長，彼此非無可增益也。真學者，應以真理爲目的，苟有真理可求，雖赴湯蹈火，亦所不辭。蓋取彼之長，補我之短，寢假以成一家之言，乃能有益也。故吾研求佛學之餘，乃兼治老子也。

吾熟讀老子書，使不思成誦，集老子註解百餘種，道家學說數十種，復以佛學及科學哲學爲參考，朝夕研求。初作老子佛學白話句解一部，繼作此老子哲學一部，自知闕昧，不啻以管窺天，願世之治老子學者，有以教之。內容分老子之主義，老子之思想，老子之宇宙觀，老子之人生觀，老子之觀物方法，老子之處世方法，

以及老子哲學與佛家之相通點，并附老子辨。蓋欲以明老子之爲老子，故反覆舉證以申其說，不避重複，分目而陳，又多相爲關應之處，意在闢俗尙道，文字簡陋，在所不計也。

大同一九四七，十一，十一。

目次

蔣序（序以日期先後爲次）	一
薛序	三
黃序	四
白序	七
本序	八
自序	九
老子之主義	
（一）平等主義	一
（二）救世主義	三
（三）非兵主義	五
（四）無欲主義	七
（五）無爲主義	八
（六）不爭主義	一〇

老子之思想

- (一) 佛學思想……………一三
- (二) 科學思想……………一五
- (三) 革命思想……………一七
- (四) 無我思想……………一九

老子之宇宙觀

- (一) 宇宙之來源……………二二
- (二) 宇宙之本體……………二五
- (三) 宇宙之妙用……………二八
- (四) 宇宙之終極……………三二

老子之人生觀

- (一) 知足寡欲……………三五
- (二) 保守天真……………三八
- (三) 養其真我……………四二
- (四) 爲而不恃……………四五

老子之觀物方法……………五〇

老子之處世方法……………五三

老子哲學與佛家之相通點

(一) 道與真如……………五七

(二) 寡欲與去貪……………六五

(三) 無身與無我……………七〇

(四) 玄同與應機……………七三

老子辨答十六疑問

(一) 老子哲學不近人情乎……………七八

(二) 老子學說爲求長生不老乎……………七九

(三) 老子消極厭世乎……………七九

(四) 老子反對知識乎……………八〇

(五) 老子主張陰謀術乎……………八一

(六) 老子主張專制乎……………八二

(七) 老子爲無政府主義者乎……………八二

(八) 老子提倡天命鬼神之說乎·····	八三
(九) 老子爲何欲廢仁義禮智·····	八三
(十) 老子何以欲廢孝慈愛敬·····	八四
(十一) 老子何以欲廢法令·····	八五
(十二) 老子爲何主張無爲與不言·····	八六
(十三) 老子哲學與佛家道理相通乎·····	八七
(十四) 老子哲學與儒家道理相通乎·····	八八
(十五) 道教教義與老子哲學相符合乎·····	八八
(十六) 因老子養生之術而流爲方士道教此爲老子之過乎·····	八九

附 錄

佛家以出世爲入世，道家以無爲爲有爲，孔子推己及人，墨子視人猶己，有無異同，試會通比較論之·····九一

老子哲學

老子之主義

夫人各有心，心各有主，老子有心，亦必有主，此不可諱言也。老子一書，都五千言，精思妙慮，盡在其中，後世作老子註者，何啻數百，申其說者，何啻千萬，然皆一人一義，十人十義，百人百義，千人千義，是猶「佛以一音演說法，衆生隨類各得解」。同一老子，註各不同，說亦自異，其間殆未嘗有言及老子之主義者。吾今摘而論之，非好奇立異，以愚惑人也，蓋有研究之價值存焉。老子之主義凡六：曰平等、曰救世、曰非兵、曰無欲、曰無爲、曰不爭。一一明之於下：

一、平等主義 世之不平也甚矣！智愚巧拙，人才之不平也；王侯臣民，職位之不平也；襲裘布褐，衣服之不平也；岑樓茅屋，居室之不平也；珍錯藜藿，飲食之不平也；此其小者，其尤大者：專制統治，居高臨下，權威之不平也；

崇富抑貧，挾貴役賤，勢力之不平也；主豐奴薄，彼奢此儉，享受之不平也；白美黑醜，優勝劣敗，見解之不平也；恃強凌弱，尙大輕小，習慣之不平也；他若生理言語風俗政治經濟法律上之不平，不一而足。因而智者謀多而侮愚，巧者心慧而虐拙，富者擁財而欺貧，貴者尊榮而壓賤，以至智益智，愚益愚，巧益巧，拙益拙；富益富，貧益貧；貴益貴，賤益賤；強弱異形，大小殊勢。凡物屈久必欲伸，窮極必思變，夫人亦然，逼之已甚，羣起反抗，階級之爭遂作。農與農戰，工與工戰，商與商戰，黨與黨戰，族與族戰，國與國戰，轉戰不已，皆不平等所致也。老子測知此情此景，心傷意悲，故大聲疾呼，提倡平等主義。

老子曰：「高者抑之，下者舉之，有餘者損之，不足者補之。」

又曰：「善者吾善之，不善者，吾亦善之，德善；信者吾信之，不信者，吾亦信之，德信。」

老子欲使高下皆平，有餘不足均等，無分貴賤，無分貧富，無分智愚巧拙，無